


## Pambano la Ulimwengu Mzima



### SABATO MCHANA

**Somo la Juma Hili:** Mt. 13:24-27; Mwa. 1:31; Eze. 28:12-19; Isa. 14:12-15; Mt. 4:1-11; Yn. 8:44, 45.

**Fungu la Kukariri:** “Nami nitaweka uadui kati yako na huyo mwanamke, na kati ya uzao wako na uzao wake; huo utakuponda kichwa, na wewe utamponda kisigino” (Mwanzo 3:15).

**K**iini cha teolojia ya Biblia ni pambano kuu kati ya Kristo na Shetani. Ingawa wazo la pambano la ulimwengu mzima kati ya Mungu na viumbe wa mbinguni walioanguka na kuasi dhidi ya Mungu ni wazo kuu la Maandiko (Mt. 13:24-30, 37-39; Ufu. 12:7-10) na pia limeenea katika mapokeo mengi ya Kikristo, Wakristo wengi wamekataa au kupuuza wazo hilo zima.

Kwa mtazamo wa kibiblia, hata hivyo, mada ya pambano la ulimwengu mzima, ambapo ufalme wa Mungu unapingwa na Shetani na malaika zake, si mada ambayo tunaweza kupuuza bila kukosa mengi ya yaliyomo katika masimulizi ya Biblia. Vitabu vya Injili pekee vimejaa rejea za Shetani na mapepo wanaompinga Mungu.

Kwa kuanzia juma hili, tutashughulikia jinsi maswali mawili yafuatayo yanavyoweza kujibiwa kulingana na aya muhimu za kibiblia:

- (1) Ni wapi Maandiko yanafundisha kwamba kuna pambano la ulimwengu mzima kati ya Mungu na Shetani?
- (2) Kwa mujibu wa Maandiko, asili ya pambano hili ni nini?

## Adui Ndiye Aliyetenda Hivi

**Soma Mathayo 13:24–27.** Mfano huu unatusaidiaje kuelewa uovu katika ulimwengu wetu?

---

Yesu anasimulia kisa cha mwenye konde ambaye alipanda mbegu nzuri tu katika konde lake. Hata hivyo, magugu yakamea katikati ya ngano. Baada ya kuona hivyo, watumishi wa mwenye nyumba wanamwuliza, “ ‘Bwana, hukupanda mbegu njema katika konde lako? Limepata wapi basi magugu?’ ” (Mt. 13:27). Hilo ni sawa na swali linaloulizwa mara nyingi leo kuhusu tatizo la uovu: Ikiwa Mungu aliumba ulimwengu ukiwa mzuri kabisa, kwa nini kuna uovu ndani yake?

**Soma Mathayo 13:28–30 kwa kuzingatia maelezo ya Kristo katika Mathayo 13:37–40.** Hili pia linafafanuaje zaidi asili ya pambano la ulimwengu mzima?

---

Bwana anajibu swali la mtumishi Wake: “ ‘Adui ndiye aliyetenda hivi’ ” (Mt. 13:28). Baadaye Yesu anamtambulisha yule “ ‘azipandaye zile mbegu njema’ ” kama “ ‘Mwana wa Adamu,’ ” ambaye ni Yesu Mwenyewe (Mt. 13:37), na anaeleza kwamba “konde ni ulimwengu” (Mt. 13:38), na “ ‘adui aliyepanda’ ” magugu ni “ ‘Ibilisi’ ” (Mt. 13:39), akieleza dhahiri pambano la ulimwengu kati ya Kristo na Shetani. Kwa nini kuna uovu duniani? Uovu ni matokeo ya adui (Shetani) anayempinga bwana. “ ‘Adui ndiye aliyetenda hivi’ ” (Mt. 13:28).

Jibu hili, hata hivyo, linaibua swali la ufuatiliaji, “ ‘Wataka twende tukayakusanye?’ ” Kwa maneno mengine, kwa nini tusiung’oe uovu mara moja “ ‘La, ’ ” bwana anajibu, “ ‘ ‘msije mkakusanya magugu, na kuzing’oa ngano pamoja nayo. Viacheni vyote vikue pamoja hata wakati wa mavuno’ ” (Mt. 13:29, 30, linganisha na Mk. 4:29). Kulingana na mfano huu, hatimaye Mungu atakomesha uovu, lakini kuung’oa mapema kunaweza kusababisha uharibifu usioweza kurekebisha unaoudhuru wema.

Ni zipi baadhi ya hatari katika kutafuta kung’oa magugu kutoka katikati ya ngano sasa? Wakati huo huo, kwa nini hili halimaanishi tu kuupuuza uovu tunaokabiliwa nao?

## Chimbuko la Pambano Duniani

Sambamba na swali katika mfano huo—kuhusu kwa nini kuna mbegu mbaya kondeni ikiwa mwenye konde alipanda mbegu nzuri tu—kuna swali lingine: ikiwa Mungu aliuumba ulimwengu mzuri kabisa, uovu uliinukaje hapa?

**Soma** Mwanzo 1:31. Maneno ya Mungu yanafunua nini kuhusu hali ya uumbaji Mungu alipomaliza kuumba na kwa nini jibu hili ni muhimu?

---

Kwa mujibu wa Mwanzo 1:31, Mungu alipomaliza kuumba ulimwengu, kila kitu kilikuwa ni “chema sana.” Katika Mwanzo 1, hakuna dokezo la uovu katika uumbaji wa Mungu wa sayari hii. Basi, uovu ulikujaje katika uzoefu wa mwanadamu?

**Soma** Mwanzo 3:1–7. Hili linatuambia nini kuhusu jinsi uovu ulivyofika hapa duniani? Hili linafafanuaje asili ya pambano la ulimwengu mzima? (Tazama pia Ufu. 12:7–9.)

---

Katika simulizi hili, tunaona uongo kuhusu tabia ya Mungu ulioibuliwa na nyoka, aliyetambulishwa kama ibilisi mwenyewe (yule “joka wa zamani”) katika Ufunuo 12:7–9. Kwanza Nyoka anatumia swali ili kuijengea shaka amri ya Mungu, karibia kugeuza kile Mungu alichokuwa ameamuru katika swali lake. Kisha, nyoka anapinga moja kwa moja kile ambacho Mungu alikuwa amesema, akimwambia Hawa, “‘Hakika hamtakufa’ ” (Mwanzo 3:4).

Mmojawapo, ama nyoka au Mungu, alimdanganya Hawa, ambaye sasa ana uchaguzi wa kufanya kuhusu ikiwa ataamini kile Mungu alichomwambia au kile nyoka alichomwambia.

Hapa na mahali pengine katika Maandiko, asili ya pambano hili kimsingi ipo juu ya nini na nani wa kumwamini, jambo ambalo lenyewe linahusiana kikamilifu na upendo. Na hiyo ni kwa sababu imani yako juu ya mtu fulani, jinsi alivyo huyo mtu fulani, na kama anaweza kutumainiwa, huathiri sana ikiwa utampenda na kumwamini mtu huyo na katika kisa hiki, kusikiliza kile anachokuambia.

**Soma** Mwanzo 3:15. Kauli ya Mungu kwa nyoka kwamba Uzao wa mwanamke, akimaanisha Masihi, ungemponda kichwa cha nyoka mara nyingi hutambuliwa kama injili ya kwanza (protoevangelium) katika Maandiko. Hii inaimarishaje ukweli wa pambano na huku ikitoa tumaini kwetu katikati yake?



**Chimbuko la Pambano Mbinguni**

Mwanzo 1–3 pekee inaonesha kwamba uovu ulikuwepo kabla ya Anguko la Adamu na Hawa. Hata kama uovu haukuwa uhalisi wa kuonekana katika Bustani ya Edeni, kwa kudhahania, “uovu” tayari umeonekana, kwa jina la “mti wa ujuzi wa mema na mabaya” (Mwa. 2:9, 17). Kisha nyoka anamshutumu Mungu kwa kusema uongo wakati, kwa kweli, yeye, nyoka, ndiye anayesema uongo. Kuwepo kwa nyoka (Ufu. 12:9), pamoja na uongo wake, kunaonesha uhalisi wa uovu huko. Hivyo, hata katika Bustani ya Edeni kabla ya Anguko, uwepo wa uovu unadhihirika.

**Soma Ezeieli 28:12–19 kwa kuzingatia Kutoka 25:19, 20. Ni nini asili ya anguko la kiumbe huyu?** \_\_\_\_\_

Kwa mujibu wa aya hii, chimbuko la uovu na pambano la ulimwengu wote ni mbinguni.

Kabla hajaanguka, yule kiumbe aliyekuja kujulikana kama Shetani alikuwa kerubi afunikaye. Zaidi ya kutambuliwa kama kerubi huyu, alikitia “‘muhuri kipimo, umejaa hekima, na ukamilifu wa uzuri’” naye alikuwa “‘ndani ya Edeni, bustani ya Mungu’” (Eze. 28:12, 13). Hakuna lolote kati ya mambo haya lingeweza kusemwa juu ya mfalme wa kibinadamu wa Tiro (au mwanadamu mwingine yeyote). Kwa hiyo, tunajua kwamba tumepewa hapa kuona kidogo anguko la Lusifa.

**Soma Isaya 14:12–15. Hili linafafanuaaje zaidi juu ya chimbuko la pambano kuu?** \_\_\_\_\_

Kwa mujibu wa Isaya 14, Lusifa aliamua kujiinua na kujifanya kama Mungu. Aya hii inakamilisha kile tulichoona katika Ezeieli 28, kwamba “moyo wake uliinuka” kwa sababu ya “uzuri” wake (Eze. 28:17), ambao ulipaswa kumfanya amtukuze Mungu aliyemuumba kuwa mzuri. Badala yake, alijivuna. Mbaya zaidi, kwa kiburi hiki, aliazimia kuchukua nafasi ya Mungu na kumtukana. Neno la Kiebrania linalomaanisha “uchuuzi” katika Ezeieli 28:16 pia linamaanisha “uzushi/uongo,” jambo linaloonesha jinsi Shetani atakavyotenda dhidi ya Mungu na dhidi yetu pia.

Tunaelewaje uhakika wa kwamba Lusifa, aliyeanguka, hapo awali alikuwa “mkamilifu . . . tangu siku ile” alipoumbwa “hata uovu ulipoonekana” ndani yake (Eze. 28:15)? Kiumbe mkamilifu angeweza kuanguka isipokuwa kama kuwa “mkamilifu” kulijumuisha uhuru wa kweli wa kimaadili?

## Ukianguka Kunisujudia

Kutafuta kwa Shetani kujitwalia kiti cha enzi cha Mungu pia kumefunuliwa katika masimulizi ya majaribu yanayopatikana katika Mathayo 4 na Luka 4. Katika makabiliano ya kushangaza kati ya Yesu na mjaribu, mengi yanafunuliwa kuhusu asili ya pambano hilo. Hapa tunaona ukweli wa pambano kuu kati ya Kristo na Shetani, lakini likielezwa kwa maneno ya wazi na kuoneshwa bayana.

**Soma Mathayo 4:1–11. Uhalisi wa pambano kuu kati ya Kristo na Shetani unafunuliwaje hapa?** \_\_\_\_\_

Roho alikuwa “amemwongoza” Yesu nyikani kwa kusudi dhahiri kwamba Yesu “ajaribiwe na Ibilisi” (Mt. 4:1). Na kabla ya kukabiliana pambano hili, Yesu alifunga kwa siku arobaini. Kwa hiyo Shetani alipokuja, alimjaribu Yesu ageuze mawe kuwa mkate, akichochea njaa kali ya Yesu. Lakini Yesu alipinga jaribu hilo kwa Maandiko na mbinu ya Shetani ikashindwa.

Kisha, katika kujaribu kumfanya Yesu atende kwa kujiamini mno, Ibilisi alimshawishi Yesu ajitupe chini kutoka kwenye kinara cha hekalu. Shetani alipotosha Maandiko ili kupendekeza kwamba ikiwa kweli Yesu alikuwa Mwana wa Mungu, malaika wangemlinda. Lakini Maandiko yakisomwa inavyotakiwa, Yesu anapinga tena jaribu hilo.

Jaribu la tatu linadhihirisha wazi kile ambacho Shetani anajaribu kutimiza. Anataka Yesu amwabudu. Shetani anajaribu kujichukulia ibada ambayo ni ya Mungu pekee.

Na ili kufanya hivyo, anamwonesha Yesu “milki zote za ulimwengu na fahari yake” kisha anadai: “ ‘Haya yote nitakupa, ukianguka kunisujudia’ ” (Mt. 4:8, 9). Kwa hakika, katika Luka 4:6, andiko linalofanana na Mathayo, ibilisi anadai: “ ‘Nitakupa wewe enzi hii yote, na fahari yake, kwa kuwa imo mikononi mwangu, nami humpa ye yote kama nipendavyo’ ” (Luka 4:6).

Kwa mara nyingine tena, Yesu anapinga jaribu hilo kwa Maandiko, na tena Shetani anashindwa.

Katika visa vyote vitatu, Yesu alitumia Maandiko kujilinda dhidi ya mashambulizi ya adui.

Waefeso 6:12 inatukumbusha kwamba “kushindana kwetu sisi si juu ya damu na nyama; bali ni juu ya falme na mamlaka, juu ya wakuu wa giza hili, juu ya majeshi ya pepo wabaya katika ulimwengu wa roho.” Ingawa hatupaswi kuishi kwa hofu, kwa nini lazima tukumbuke uhalisi wa pambano linaloendelea kutuzunguka?



## Asili ya Pambano la Ulimwengu Mzima

Tumeona baadhi ya aya zinazofundisha pambano la ulimwengu mzima kati ya Mungu na Shetani. Lakini pambano kama hilo linawezekanaje? Anawezaje yeyote kumpinga Mwenyezi Mungu? Ikiwa pambano la ulimwengu mzima lingekuwa juu ya mamlaka tu, lingekuwa limekwisha kabla ya kuanza. Ni lazima liwe la aina tofauti. Kwa hakika, Maandiko yanafunua kwamba pambano hilo ni shindano dhidi ya tabia ya Mungu—pambano juu ya madai ya uongo/uzushi yaliyotolewa na Shetani dhidi ya Mungu, kwamba (miongoni mwa mambo mengine) Yeye si mwema na mwenye upendo kabisa. Madai kama haya hayawezi kushindwa kwa nguvu na mabavu bali kwa kulinganisha wahusika wawili wanaoshindana.

“Katika kushughulika na dhambi, Mungu alitumia haki na kweli tu. Shetani alitumia kile ambacho Mungu hawezi kutumia—udanganyifu na uongo. Alitafuta kubadilisha ukweli wa neno la Mungu uonekane uongo na aliwasilisha vibaya mpango wa serikali Yake mbele ya malaika, akidai kuwa Mungu hakuwa na haki ya kuweka sheria na kanuni za kuwaongoza wakazi wa mbinguni; kwamba katika kuwataka viumbe Wake wajisalimishe Kwake na kumtii Yeye, Mungu alikuwa akitafuta kujiinua tu. Kwa hiyo, ilipasa idhihirike mbele ya wakazi wote wa mbinguni, na mbele ya sayari zote, kuwa serikali ya Mungu ilikuwa ya haki, sheria Yake ilikuwa kamili. Shetani alitengeneza mazingira yaliyoonesha kana kwamba yeye mwenyewe alikuwa akipambania mambo ustawi wa ulimwengu wote. Tabia halisi ya Ibilisi, na lengo lake halisi, ilikuwa lazima vieleweke kwa wote. Ilipasa apewe muda ili ajidhihirishe mwenyewe kwa kazi zake ovu.”—Ellen G. White, *Pambano Kuu*, uk. 410, 411.

**Soma** Yohana 8:44, 45 kwa kuzingatia Ufunuo 12:7–9. Aya hizi zinafunua nini kuhusu tabia ya Shetani na mkakati wake?

Mpango wa Shetani tangu mwanzo umekuwa kujaribu kuwafanya viumbe waamini kwamba Mungu hakuwa mwenye haki na mwenye upendo na kwamba sheria Yake ilikuwa ni yenye kukandamiza na kuwadhuru. Si ajabu Yesu anamrejelea Shetani kama “mwongo na baba wa” uongo (Yn. 8:44). Kinyume chake, Yesu alikuja “kuishuhudia kweli” (Yn. 18:37) na kupinga moja kwa moja uongo na uzushi wa Shetani, akishinda na hatimaye, kumharibu Shetani na nguvu zake (1 Yoh. 3:8, Ebr. 2:14).

Ufunuo 12:9, 10 inamtambulisha Shetani kama (1) “nyoka wa zamani,” (2) kama yule ambaye katika mahakama ya mbinguni anawashitaki watu wa Mungu, na (3) kama joka mwenye mamlaka audanganyaye ulimwengu. Neno la Kiyunani linalotafsiriwa “Ibilisi” linamaanisha tu “mzushi/mwongo,” likionesha tena kwamba asili ya pambano hili ni juu ya imani, ikijumuisha imani kuhusu tabia ya Mungu.

**Jifunze Zaidi:** Soma Ellen G. White, “Chimbuko la Uovu,” uk. 406–415, katika Pambano Kuu.

“Hakuna wazo ambalo limefundishwa kwa uwazi zaidi katika Maandiko kuliko wazo kuwa Mungu kwa namna yoyote ile hawajibiki na uingiaji wa dhambi; kwamba hakukuwa na uondoaji kiimla wa neema ya Mungu, kwamba hakukuwa na dosari katika serikali ya Mungu, iliyosababisha kuinuka kwa uasi. Dhambi ni mvamizi, ambaye hakuna sababu inaweza kutolewa kwa ajili ya uwepo wake. Dhambi ni fumbo, haielezeki; kuitolea udhuru ni kuitetea. . . . Ikiwa [Shetani] angeangamizwa asiwepo kabisa, [wakazi wa mbinguni na wa malimwengu mengine] wangemtumikia Mungu kwa hofu kuliko kwa upendo. Mvuto wa mdanganyaji usingeangamizwa kabisa, wala roho ya uasi isingondolewa kabisa. Ilipaswa uovu uruhusiwe ukomae. Kwa manufaa ya ulimwengu wote katika vizazi vyote, Shetani alipaswa kuendeleza kanuni zake kikamilifu, ili shutuma zake dhidi ya serikali ya Mungu zionekane katika nuru yake halisi kwa wenye uhai wote walioumbwa, ili haki na rehema za Mungu na kutobadilika kwa sheria Yake visihojiwe milele zote.”—Ellen G. White, *Pambano Kuu*, uk. 406, 411.

### Maswali ya Kujadili:

- ① Watu wengi wanajiuliza jinsi ambavyo kiumbe asiye na dhambi kama Lusifa angeweza kutenda dhambi kwa mara ya kwanza. Kwa nini dhambi ni “fumbo” kubwa tena “lisiloelezeka”? Tunawezaje kuelezea dhambi hii ya kwanza bila kuitolea udhuru au kuihalalisha? Yaani kwa nini kuelezea asili yake ingekuwa sawa na kuihalalisha?
- ② Kwa nini Mungu hakumwangamiza Shetani mara moja? Kwa nini ni lazima uovu ‘uruhusiwe ukomae’? Ni kwa vipi hili ni “kwa manufaa ya ulimwengu wote katika vizazi vyote”?
- ③ Kwa nini ni muhimu sana kuelewa kwamba pambano kati ya Mungu na Shetani halihusu mamlaka tu, bali ni pambano la aina tofauti? Pambano juu ya tabia linaelewekaje kwa njia ambazo pambano juu ya mamlaka lisingeeleweka?
- ④ Kuelewa asili ya pambano kunafunua chimbuko halisi, yaani, njia ambazo maisha yako mwenyewe yanaweza kuwa mfano mdogo wa pambano la ulimwengu mzima? Ni kwa njia zipi hata sasa unapitia uzoefu wa uhalisi wa pambano hili? Unapaswa kuitikiaje kwa njia zinazoonesha kwamba wewe uko upande wa nani hasa?